

**BAT-BATEKO BERTSOAK IDATZIZ EMATEKO IRIZPIDEAK**  
**2023-06-13**

**IKERKUNTZA TALDEA**  
**BERTSOZALE ELKARTEA**

## AURKIBIDEA

AITZINSOLASA .....	4
<b>A. TESTUARI DAGOZKION IRIZPIDEAK .....</b>	<b>5</b>
1. GAI-EMAILEAREN HITZAK .....	5
2. BAT-BATEKO BERTSOAK .....	5
2.1. Hiztegia	
2.2. Deklinabidea	
2.3. Aditza	
2.4. Bokal elkarketak	
2.5. Bokal arteko kontsonante galerak	
2.6. Nafarroako euskalkitzat	
2.7. Txokokeriak	
3. AHOZKOARI ALDAKETAK EGIN BEHARREKO ZENBAIT KASU .....	6
3.1. EZ partikula	
3.2. -Z GERO partikula	
3.3. BAIT- partikula	
3.4. Aditzetan; bi bokal berdin ondoan	
3.5. Aspirazioa	
3.6. [i + kontsonante] inguramenduko bustidura	
3.7. Nahasketak	
4. IDAZKETA ZEINUAUAK .....	7
4.1. Lerro amaieran koma edo puntu eta koma	
4.2. Puntuaren barruan koma edo puntu eta koma	
4.3. Puntua	
4.4. Harridura eta galdera ikurrak	
4.5. Aipuak.	
4.6. Bi puntuak	
4.7. Apostrofeak:	
4.7.1. ERE	
4.7.2. Aditz elkarketak	
4.7.3. Hainbat kasu	
4.7.4. Aferesiak	
4.7.5. Laburdurak	
4.8. (bis)	
4.9. Puntu bat errepika segidan izan gabe	

5.	LETRA ETZANA ALA BOROBILA .....	11
5.1.	Jaialdien leloak	
5.2.	Erdaraz eta estilo zuzenean egindako aipuak	
5.3.	Ekimenen izenak	
6.	MAILEGU ETA MAILEGUONDOAK .....	12
6.1.	Ingelerazko eta latinezko hitzak	
6.2.	Frantsesezko eta gaztelaniazko hitzak	
7.	BERTSO LERROAK BANATZEKO BI TRADIZIO .....	12
8.	PUNTU ERANTZUNeko ARIKETA .....	13
9.	AUTORETZA .....	14
	<b>B. KOKAPEN IRIZPIDEAK.....</b>	<b>14</b>
1.	LEKUA .....	14
1.1.	Herria	
1.2.	Auzoa	
1.3.	Lapurdi, Baxenabarre edo Nafarroa Beherea eta Zuberoa	
2.	DATA .....	14
3.	BERTSOLARIEN IZEN-DEITURAK .....	15
4.	AURKEZLEA, GAI-EMALEA ETA GAI-JARTZAILEA .....	15
5.	GAIA .....	16
6.	NEURRIA .....	16
7.	DOINUA .....	16
8.	BERTSO ESKOLA LARRIZ ALA XEHEZ .....	16
9.	KOKAPEN IRIZPIDEAK APLIKATUTAKO ADIBIDEA .....	16
	<b>C. BERTSOGINTZAKO ARIKETA IZENAK .....</b>	<b>18</b>

## **AITZINSOLASA**

Bertsozale Elkarteak 1991n eman zituen argitara “Bapateko bertsoen transkribapenerako erizpideak” lana. 2003an, berriz, lan eder haren eguneratze handia egin zuen Bertsozale Elkarteko Ikerkuntza Batzordeak. Eta orain, 2022an, ibiliak eragin dituen galdera berriei edo lehengoei xehetasun handiagoz erantzuteko, 2003ko txostena aztertu eta ekarpen berriak egin ditugu Ikerkuntza Batzordean. Esan gabe doa, ez da izan orain arteko irizpideak txarrak edo desagokiak zirelako. Irizpide horiek laguntza ederra izan dira azken urteotan bapateko bertsoak idatziz ematen aritu direnentzat, baina aitzina joan arau ikusi da zenbait alderdi doitu beharra zegoela, beste zenbait osatu egin behar zirela, eta, beste batzuetan, ikuspegia moldatzea komeni zela, jokabideak argitze aldera.

Sortzez da kontraesankorra ahoz kantatua idatziz ematea. Beharrezko lana da, hala ere. Irizpide hauek emateko orduan, kantatua ahalik eta ongien gordez, irakurlearentzat lana zailegi gerta ez dadin saiatu gara. Bertsolariak kantatu duen hartara ahalik eta gehien hurbiltzea izan da helburua.

Bertsoak bere-bereak dituen ahozko hizkeraren ezaugarriak gordetzea garrantzitsua iruditu zaigu, eta hala, lehen atalean, bertsolariak kantatu bezala idatziko direnak azaldu ditugu. Bigarren atalean, berriz, dela hizkuntza arauak beraiek ahozkoa lehenesten dutelako, dela irakurketa errazten dutelako, aldaketak egin beharreko zenbait kasu aztertu ditugu.

Hemen eman ditugun irizpide hauek bertsoak argitaratzeko eta artxibatzeko daude pentsatuta. Horregatik, testuari bete-betean dagozkion irizpideez gain, bertso saioak eta bertsoaldiak nola kokatu behar diren ere zehaztu beharra ikusi dugu.

Gisa guziz, beti fintzen joan beharreko alorra da irizpideena. Ahaleginak eginda ere, irizpide hauek ez dute egia osorik. Aurrera begira moldaketak etor daitezke, eta etorriko dira. Gure asmoa ez baita atea erabat ixtea, etapa berri bat irekitzea baizik.

**Bertsozale Elkarteko Ikerkuntza taldea**

## A. TESTUARI DAGOZKION IRIZPIDEAK

1. **GAI-EMAILEAREN HITZAK** euskara batuan idatziko dira, non eta euskalki edo azpieuskalki ñabardura horiek ez diren bertso-gai bihurtzen.

2. **BAT-BATEKO BERTSOAK**, ahoz sortua baita –eta inprobisatua, gainera–, ezinbestean, ahozko hizkeraren ezaugarriak erakusten ditu. Ahal den neurrian, horiek gordetzen saiatuko gara. Horregatik, **bertsolariak kantatu bezala** emango dira:

2.1. **Hiztegia**: “parkatu” kantatuz gero “parkatu” idatziko da, eta ez “barkatu”; hots, ahoskatu bezala, letra borobilez eta komatxorik gabe. Gisa bera “apez” esanez gero, “apez” idatziko da, eta ez “apaiz”.

Gauza bera, hitz beraren aldaera fonetiko bat baino gehiago agertzen bada bertso edo bertsoaldi batean. Adibidez, batean “sekula” eta hurrengoan “sekulan”; batean “zena” eta hurrengoan “zana”; batean “alperra” eta hurrengoan “alferkeria”... Aldi bakoitzean, **bertsolariak esan bezala** aldatuko da paperera. Gisa bera, bertsolariak esan bezala idatziko dira beste adibide hauek ere: behinepin, alperrik, alperra, ifarralde, parre, irripar, pakea, bekatu, bapatean...

2.2. **Deklinabidea**: Bertsolariak “lagunagaz”, “lagunarekila” edo “lagunarekin” esan badu, kantatu bezala aldatuko da; letra borobilez eta komatxorik gabe. Eta berdin deklinabideko gainerako kasuetan ere: nondik/nondikan/nondio edo norentzat/norendako eta abar.

2.3. **Aditza**: “Zerate”, “gira”, “dautsut”, “niz” edo “zagozie” kantatuz gero, bere horretan emango dira; letra borobilez eta komatxorik gabe.

2.4. **Bokal elkarketak**. Euskalki eta azpieuskalkiek kasuistika zabala erakusten dute, eta guztiak, esan bezala idatziko dira. Honela:

- [e + bok]. Beste bokal baten aurrean e > i bilakatzen da hizkera askotan: “Etxia”, “atia”, “semiengatik” edo “gaztiok” idatziko da.
- [o + bok]. Beste horrenbeste bokal aurreko o > u bihurtzen denean: “Gogua”, “juan” edo “gaiztuekin”.
- [i + bok]. I-ri bokal bat jarraikitzen zaiolarik [j], [š] nahiz [ž] tartekatzen da zenbaitetan. “Biyek”, “egixa” edo “serijjo” idatziko da.
- [u + bok]. U-ri beste bokal bat jarraikitzen zaionean, zenbaitetan –b– tartekatzen da (buruba), beste zenbaitetan u > i bilakatzen da: “eskiekin”, “akitia”. Esan bezala idatziko dira.
- [u/i + a]. Aurreko silabako bokala u edo i izanik, a > e bihurtzen da zenbait hizkeretan: “egie”, “apur bet”.
- [a + a > ea/aia]. Bertsolariak esan bezala idatziko da: “elizea”.

**2.5. Bokal arteko kontsonante galerak:** bertsolariak kantatu bezala idatziko dira honelakoak: “konponbideai” (<konponbideari), “mendian” (<mediaren), “in” edo “ein” (<egin), “errain” (<erranen)...

**2.6. Nafarroako euskalkitzat** jotzen direnetan, singularreko bigarren pertsonan, “yaiz”, “yuke”, “yitzan” .... esaten dute, eta halaxe idatziko da.

**2.7. Txokokeriak** edo Euskal Herria osotasunean hartuta **ulermenerako eragozpen** izan daitezkeen formak oin-oharretan argituko dira.

### 3. AHOZKOARI ALDAKETAK EGIN BEHARREKO ZENBAIT KASU:

**3.1. EZ partikula.** Aditzaren aurreko ez partikulak, aldaketa fonetiko ugari sortzen du: ez zara = etzara; ez dut = eztut; ez da = ezta; ez zen=etzen; ez neki(e)n = enekin. Adibide hauek guztiak, ahozko hizkeran aldaketa fonetiko horiekin ahoskatu behar dira, eta idazterakoan bereizita eman. Horregatik, oin izan nahiz ez, bereizita idatziko dira, eta **irakurlearen esku geratuko da dagokien bezala irakurtzea**. “Ettugu”, eta antzeko kasuetan, bere horretan transkribatuko dugu (letra borobilean eta komatxorik gabe) eta oin-oharretan “ez ditugu” dela adieraziko dugu.

**3.2. -Z GERO partikularen** kasuan, ohikoa da [aditza+ezkero] formulara jotzea. Neurrian aldaketarik eragiten ez den heinean, behar den bezala idatziko dira. Honela, bertsolariak “joan ezker” esaten badu, “joanez gero” idatziko da; edo “egin ezker” esan badu, “eginez gero”. Badira, ordea, zuzenduz gero neurrian aldaketak izango lituzketen kasuak. Horiek, aldaketarik egin gabe idatziko dira. Beraz, bertsolariak esan bezala idatziko da “etorri ezker”; “etorri ezker” esan eta “etorri gero” idatziko balitz, silaba bateko aldea egongo bailitzateke.

**3.3. BAIT- partikulak,** aditzari erantsita joan behar du, eta aldaketa fonetikoak, ahoz nahiz idatziz, markatu egin behar dira. Honenbestez, oin izan nahiz ez, “baita”, “baitugu”, “baikara” edo “baitziren” idatziko da.

**3.4. Aditzetan, bi bokal berdin ondoan** doazenean, aukera izaten da silaba bakar batean ebaki ala bitan egin. Osorik idatziko da hitza: “nukeen”, eta ez “nuken”. Irakurleari dagokio bertsolariak nola esan duen interpretatzea, neurriak lagunduko baitio horretan.

**3.5. Aspirazioarekin,** Euskaltzaindiak euskara baturako emaniko arauak beteko dira, kasu guztietan. Bokal artean edo diptongo haustaile modura erabiltzen diren h-ekin sor litezkeen neurri gorabeherak, irakurleari dagozkio interpretatzea. Esaterako, “zahar” hitzak bi silaba izango ditu “etxe zahar hau ikusi eta” esaten badu bertsolariak, eta silaba bakarra, “amona zahar hau ikusi eta” esan badu.

**3.6. [i + kontsonante] inguramenduan,** euskalki askotan **bustidura** gertatzen da. Horietan, Euskaltzaindiak euskara baturako onartu dituen formak erabiliko dira. Hala, “egiña” esan bada “egina” idatziko da; “miña”, “mina”; “habill”, “habil”; “mutilla”, “mutila”; eta “attatu”, “aitatu”.

Gauza bera **eremu murriztekoak** diren beste zenbait **bustidurekin** ere: “lauña”, “killo”, “zaindu” bezalako hitzak, “launa”, “kilo” edo “zaindu” idatziko dira.

Besterik da, **adierazkortasunaren** amorez egiten den **bustidura**. Adierazkor izan daitekeen bustidura oro, bertsolariak esan bezala aldatuko da: gixon, nexka, moñoña, muxu, xixtrin, kuttuna...

Bustidurekin amaitzeko, badira sortzez adierazkorrak ziren eta egun forma neutroan koka ditzakegun zenbait hitz: muxu, xamarra, ixilik, kitto... Horiek, bertsolariak ahoskatu bezala emango ditugu: bertsolariak “muxu” esan badu, “muxu” idatziko da, eta “musu” ahoskatu badu, “musu”.

**3.7. Nahasketak:** bertsolariak hitzen bat gaizki ebakitzen badu edo gaizki ahoskatzen badu, zuzendu egingo da. Adibidez, “langa” esan beharrean, “landa” esaten badu, edo “sua” esan beharrean “zua” esaten badu, bertsolariak oker esana zuzen jartzea da egokiena. Zenbait adibidek ez dute uzten dudarako tarterik; beste zenbaitetan, interpretatu egin beharko da, eta horretarako, bertsolariarekin berarekin hitz egitea da egokiena.

Bertsolariak lapsusen bat izaten badu, ordea, argibideak oin-oharrean emango dira. Esaterako:

Ez det damurik gazte denboran  
pauso gozoak emana  
horixe baita mundu honetan  
oso berezko dan lana  
**hortikan datoz haurtxo gozoak**  
**hortik aita eta asma**  
**bikote batek ezin lezake**  
**bide hoberikan asma**  
baina galdua daukat oraingoz  
ordun egin nuen plana  
gauz bat badaukat oraindik ere  
sekulan ahazten ez dana  
haritz zahar honen azpian gozo  
nik hartu nuen laztana.

Lehen oinaren kasuan, bertsolariak “asma” esan zuen, baina argi dago “ama” esan nahi zuela. Beraz, “asma” idatziko da, baina oin-oharraren bidez azalduko da lapsus linguæa.

**4. IDAZKETA ZEINUAK:** irakurlearentzat lagungarri eta ondo ulertzeko ezinbesteko direnean baizik ez dira erabiliko idazkera zeinuak. Helburua bikoitza da: zeinu-ekonomia batetik, eta gehiegizko interpretazio subjektiboak saihestea bestetik. Bigarren honi dagokionez, transkribatzailearen esku geratzen da, ezinbestean, bertsoen interpretazioa. Transkribatzailea irakurleari laguntzen saiatuko da, beharrezko denean eta zeinuak garbi

daudenean. Baina interpretazio lan horretan irakurleak ere zuzeneko parte-hartzea izango du. Horregatik, behar beharrezkoak eta nabarmenak diren zeinuak bakarrik jarriko dira.

**4.1. Lerro hautsia esaldiak banatzeko modu bat gehiago denez idatzian, ez da beharrezkoa lerroaren amaieran koma edo puntu eta koma jartzea. Adibidez:**

Bastoiarekin ere ez da hain  
segurua karnabala  
lehengo urtean ere izan zen  
nahikoa giro petralla  
kalera irten ta gogoan dut  
dena plastikoa zala  
laban eginda erori nintzen  
mezetara nindoala.

**4.2. Puntuaren barruan ez da komarik edo puntu eta komarik erabiliko, non eta esanahia argitzeko ezinbestekoa ez den. Adibidez:**

Hori zerri galanta  
ez dabil brometan!  
Hori putasemea!  
Ta diot benetan.  
**Ta, Maialen, horrekin  
ez jarri penetan**  
konfesatuko bainaiz  
biharko mezetan.

**4.3. Puntua.** Behar denean, beti jarriko da puntua. Adibidez:

**Egun ta gauez kalabojoan  
gure barruak ozpintzen  
egondu gera. Hola errexeta da  
lur pareraino berdintzen.**  
"Irtengo zera" pentsatzen nuen  
zerbait sinistu premi zen  
baina halere ziur ez nekin  
zutik irtengo al nintzen.

**4.4. Harridura eta galdera ikurrak** beti jarriko dira. Elkarren segidan bi galdera edo harridurazko bi esaldi baldin badatoz, biei jarriko zaie ikurra, eta maiuskulaz idatziko da hurrengo hitzaren lehen letra. Adibidez:

**Holako eztabaidari  
zertarako ekin?  
Zergatik katiatu  
metal kontuekin?**  
Hainbeste burni zati



dezunez zurekin  
sartuko zera baina  
ekipaiarekin.

**4.5. Aipuak.** Esaldi kate baten barruan bertso zati bat txertatzen denean, **komatxoak** erabiliko ditugu, eta lerroak bereizteko, honako ikur hau erabiliko dugu, alde banatan tartea utzita: /.

Bertso osoa zitatzen ez denean, kendutako testuaren tokian honako ikur hau jarriko da: (...). Baita bertsoa esaldi katean txertatzen denean ere. Adibidez:

Umea zuri zenbat goraintzi  
oroimenak du mila garrantzi  
(...)

(...)  
Bere argazki bat badago gelan  
sekula ez dizut utzi  
ta ze marrazki egin diozun  
zoaz eta erakutsi.

(...)  
zuri barrutik atera zaizu  
zenbat maitasun ta antsi!  
(...)

“Eta Irazuk 2001eko Txapelketa Nagusiako finalean kantatu zuen pasarte hau: “(...) Aita gabe ezin etsi / ta marraztera iritsi / (...) bere argazki bat badago gelan / sekula ez dizut utzi / ta ze marrazki egin diozun / zoaz eta erakutsi”. Zeresan ugari sortu zuen bertsoaldi honek”.

Komatxoekin emaniko bertso zatiak estilo zuzenean eginiko aipuren bat baldin badu, atal hori komatxo sinpleekin (") idatziko dugu. Adibidez: “Txirritarena da beste adibide hau ere: “Leihotikan ujuka / ama ta bi atso / ‘Ez dek harrapatuko / uste bezin mantso!’(...)”.

Bertsoak edo bertso zatiak esaldi katetik kanpo doazenean, ez da inolako komatxorik erabiliko horiek emateko. Adibide horietan ere estilo zuzeneko aipurik baldin bada, komatxoekin idatziko dira.

Puntuazio ikurrak: puntuak (.), kakotxak (,), puntu eta kakotxak (;), bi puntuak (:), eta galdera (?) eta harridura ikurrak (!)?, komatxoaren aurretik edo ondotik jar daitezke, aldian-aldian zeri dagokion: edo koma arteko zatiari, edo koma artekoaz gaindikoari.

**4.6. Bi puntuak** erabili egingo dira, eta hurrengo hitza letra xehez idatziko da:

(...)  
Gauza bat garbi esan nahi diot  
pertsonek degun orori:  
bizitza denok merezi degu  
gauza jakina da hori.

Bertsoaren barneko aipuak kakotx artean sartuko dira, bi puntuen beharrik gabe, baina aipuaren lehen letra maiuskulaz idatziko da. Adibidez:

(...)  
Esan zidan “Mesedez  
etor zaitez hona”  
(...)

(...)  
Leihotikan ujuka  
ama ta bi atso  
“Ez dek harrapatuko  
uste bezin mantso!”

**4.7. Apostrofeak:** (') apostrofeak, elipsiaren adierazletzat onarturik, erabilera zehatz hauek izan ditzake:

- **ERE** hitzarekin egin ohi diren kontrakzioen adierazle: lo´re (lo ere), hi´re (hi ere), bat´e (bakar bat ere), gaur´e (gaur ere)... Bertsolariak kontrakzioa eginda kantatu badu, apostrofearekin transkribatuko da. Besterik da bertsolariak “bate” badio batere-n zentzuan (inondik ere edo inongo-ren zentzuan); kasu horretan bate idatziko da.
- **Zenbait aditz elkarketaren adierazpide** ere apostrofea erabiliko da: “pentsatzeu” kantatu duenari, pentsatze´u transkribatuko zaio; “ateratzeizkio” esan duenari, ateratze´izkio, edo “ekartzazu” kantatu duenari, ekar´zazu.
- Ondoko kasu hauek, berriz, **lotuta idatziko dira**: begiraiogun (begira diezaio), emadazu (eman iezadazu), esazu (esan ezazu)...
- **Aferesiak** ere apostrofearekin transkribatuko dira: ´torri, ´karri, ´makume...
- **Laburdurak** ere apostrofearekin transkribatuko dira: gerra´ (gerrara), ganbara´ (ganbarara)...

**4.8. (bis).** Bertsolariak errepika egiten duenean (bis) ikurra jarriko da errepikatzen duen lerro edo puntuaren ondoan. Adibidez:

Doinua: *Uso xuria errazu I*

Galdera egin dezuz zinez  
ta ni erantzun ezinez. (bis)  
Bakarrik zaude laguntza eske  
bakardaderik haundinez.  
Laguna edo ni behar nauzun  
argitu zazu gutxinez. (bis)

#### 4.9. Puntu errepika segidan ez delarik:

Arestian adierazi bezala, puntu bat segidan errepikatzen delarik (bis) adierazlea idatziko dugu. Zenbait airetan, ordea, puntua ez da segidan errepikatzen; puntu jakin hori kantatu ondoren, beste puntu bat (edo gehiago) kantatu ohi da, eta ondotik errepikatzen da aurrez kantatutako puntu hori bera osorik. Horrelakoetan, errepikatu den puntua (edo puntuak) parentesi artean idatziko dugu, eta irakurleari oin-ohar batez jakinaraziko diogu puntua nahitara errepikatu duela bertsolariak. Adibidez:

##### A. Azpiroz

Neurria: Hamarreko txikia  
Doinua: *Zibilak esan naute*

Kaixo bertsozalea  
ez zera hutsala!  
Izerdiak norberak  
sikatu ditzala  
udazkenean udako  
giroz gabiltzala  
gasaren prezioan  
jarri da itzala!  
(Udazkenean udako  
giroz gabiltzala)<sup>1</sup>  
hego haizeak denok  
txoratu gaitzala!

## 5. LETRA ETZANA ALA BOROBILA

5.1. Jaialdien leloak, liburuen izenburuak eta hitz arrunten konnotaziozko adierak letra etzanez eta jatorrizko grafian idatziko dira. adibidez:

*Bai Euskarari* aldarripean  
elkartu gara gaur hemen  
(...)

*Obabakoak* baino lehenago  
idatzi zuen *Bi anai*.  
(...)

*Txokolatea, segapotoa*, eta abar

5.2. Erdaraz eta estilo zuzenean egindako aipuak kakotx artean eta letra etzanez idatziko dira.

---

<sup>1</sup> Hirugarren puntua errepikatu zuen kantuan.

**5.3.** Ekimenen izenak letra etzanez idatziko dira: *Bertso Eguna, Bertso Udalekuak, Bertsoaroa Ezta kasualitatea, Kopla barik, ...* Aldiz, Bertsolari Txapelketa Nagusia idatziko dugu, borobilez.

## 6. MAILEGU ETA MAILEGUONDOAK

**6.1.** Ingelerazko eta latinezko hitzen kasuan, Euskaltzaindiak euskara baturako onartu dituenak letra borobilez idatziko dira. Gainontzekoak letra etzanez eta jatorrizko grafian idatziko dira.

**6.2.** Frantsesezko eta gaztelaniazko hitzen kasuan, **ahalik eta gutxien idatziko dira letra etzanez**. Hitzunentzat ohikoak diren frantsesezko eta gaztelaniazko eleak letra borobilez idatziko dira, eta beti ere **euskal grafiaz idatziko dira**. Esaterako: truz (trousse), tenisak (tennis), ronpuena (rond-point), kotxea (coche), abioia (avión),...

### Hainbat kasu:

- “Laik” esan badu bertsolariak:
  - Euskaltzaindiak baturako “Like” onartua balu, “Like” (borobilez) idatziko genuke. Eta oin-oharrean: “Bertsolariak “Laik” ahoskatu du” idatziko genuke.
  - Euskaltzaindiak “Like” baturatu ez balu onartuta, “Like” (etzanaz) idatziko genuke. Eta oin-oharrean: “Bertsolariak “Laik” ahoskatu du” idatziko genuke.
- “Montecristua”: euskarak bereganatua duen arren, marka denez, c-rekin idatziko dugu (marka ez balitz k-rekin transkribatuko genukeen)

## 7. BERTSO LERROAK BANATZEKO BI TRADIZIO

Bertsoa lerrotan banatzeko bi usadio ditugu bizi-bizirik: Ipar Euskal Herrikoa (puntu osoa lerro bakarrean) eta Hego Euskal Herrikoa (hemistikioak lerro bakarrean). Biak dira egokiak, baina bi irizpideetan bigarrena baliatu ohi dugu eta ez dago zertan. Bi tradizioak dira bizirik, eta hala segi dezaten bertso lerroak idazterakoan modu hauek hobetsi ditugu:

**7.1.** Lapurdin, Baxenabarren edo Zuberoan sortutako bertsoen puntuak lerro bakarrean ematea, Bapatean, Xilaba, Elkarteko komunikazio euskarrietan eta abar. **Bada, ordea, salbuespen bat: BTNko liburuako bertsoaldiak.**

Bertsolari Txapelketa Nagusiko (BTN) liburuak doinu berrien transkripzioak dakartza; eta doinu berrien transkripzioa (pentagrama...) testuaren transkripzioaren araberakoa da. Hots, testuaren transkripzioak baldintzatzen du doinuarena. Errima arteko doinua lerro bakarrean transkribatuz gero, maketazioa konplikatuko luke. Gerta liteke, gainera, mugako alde bateko

sortzaileak beste aldeko herrian plazaratzea doinu berria, eta, kasu horretan, kantatzen den lekua bainoago doinuaren sortzailearen jatorria ez ote genukeen hobetsi behar ez dugu argi. Hala eginez gero, handiagoa litzateke anabasa. Beraz, sortzaileari zor zaion begirunearengatik eta doinuen maketazioko arrazoiengatik, BTNko bertsoaldiak Hego Euskal Herriko tradizioaren arabera idatziko dira, aterabide hoberik atzeman artean.

**7.2.** Aurreko puntuan esaten dena, bertsolaritzari buruzko hezkuntzako materialean aplikatzea, eta puntu osoa lerro bakarrean ematearen tradizioari buruzko berriazko aipamena egitea egokia jotzen delarik.

**7.3.** Horren araberako neurrien izendapena baliatzea (zortziko txikia beharrean, lau puntuko txikia).

## **8. PUNTU ERANTZUNEN ARIKETA**

Puntu erantzuneko ariketan gai-emaileak eta bertsolari batek parte hartzen dute. Edo bi bertsolarik; batek ematen du puntua eta besteak erantzun osoa. Puntua gai-emaileak ematen duelarik, ez da haren izenik idatziko, ezta bertsolariarena ere erantzuna aitzin. Gai-emailearen izena aipatua izango da saioaren aurkezpenean, eta bertsolariarena bertsoaldiaren aurkezpenean.

Horrelakoetan puntuaren eta erantzunaren artean tartea utziko da, eta puntua letra lodiz idatziko da. Bertsolariaren erantzuna emandako lehen puntuaren segida balitz (esaldi bera) letra txikiz hasiko dugu idazten; beste esaldi bat balitz, letra larriz.

Bestalde, lehen puntua dagokion puntuazio markarekin idatziko da (puntua, harridura, galdera ikurra...).

### **N. Elustondo**

Neurria: Zortziko txikia

Doinua: *Orain hasi bihagu*

#### **Turistaz betetzen da udan kostaldea**

ta esan dizut biktima

bat dela Nerea!

Nahiz ta gustoko ez izan

datorren jendea

ni're turista izan

naiteke ordea.

Aldiz, beste bertsolari bat (edo batzuk) delarik puntua ematen duena, bere izena idatziko dugu puntuaren aurretik. Eta erantzunaren aurretik erantzuten duen bertsolariren

izena, ez dadin nahasmenik sor. Kasu horretan ez dugu lehen puntua letra beltzaranez nabarmenduko, ez baita behar.

#### **A. Intxausti**

Etxea ez da soilik  
zerbait materiala.

#### **S. Colina**

Izan leike ondare  
emozionala  
horregatik ni noan  
tokira noala  
bertan sentitu nahi dut  
etxean bezala.

### **9. AUTORETZA**

Bertsozale Elkartek jakinarazten du transkribatzen diren gai eta bertsoen testuek **autoreak** dituztela, eta saioek antolatzaileak. Edozein saio, bertsoaldi edo bertso publikatzerakoan beharrezkoa izango da bakoitzari dagokion aitortza egitea. Hedapen publikoari dagokionez, libreka da informazio funtziotarako legeak ezarritako irizpideen baitan; gainerako funtziotarako bertsolarien baimena beharrezkoa izango da.

### **B. KOKAPEN IRIZPIDEAK**

Bertsoaldia ze saioen baitakoa den, noiz eta non izan den, parte hartzaileak zein izan diren nahiz bertso sortaren inguruko zenbait argibide emateko dira kokapen irizpideak. Transkribatutako bertsoak bere kontestuan ulertu ahal izateko gomendagarria da ondorengo informazioa ematea: lekua / data / gai-emailea (aurkezlea, gai-jartzailea) / gaia / neurria / doinua / bertsoak.

#### **1. LEKUA**

- 1.1. Herria**, Euskaltzaindiaren izendegi ofizialean onartutako moduan idatziko da. Adibidez: Oiartzun, Durango, Gasteiz, Lesaka, Markina-Xemein...
- 1.2. Auzoa** denean, herriaren izena lehenengo, eta jarraian, parentesi artean auzoa adieraziko da. Adibidez: Bilbo (Santutxu), Ataun (Aia), Mutiloa (Lierni), Azpeitia (Landeta)...
- 1.3. Lapurdi, Baxenabarre edo Nafarroa Beherea eta Zuberoa** dira Euskal Herriko herrialde; *Xilaba* ez da herrialde bat. Beraz, herrialde izenak baliatuko ditugu lekuari buruz ari garelarik, potreten oin-oharretan, besteak beste.

## 2. DATA

**Eguna:** uuuu-hh-ee. Adibidez: 2002-10-26

Grabazio zahar **batzuetan ez da erraza data zehazten**. Horrelakoetan ahalik eta gehien hurbiltzen saiatuko gara. Bertsoak entzuteak informazio asko ematen du: San Juan jaiak direla, halako langileak greban daudela, urte sasoi...

Adibidez: 1966ko San Pedro jaiak, 1977ko udaberria...

## 3. BERTSOLARIEN IZEN-DEITURAK

**3.1.** Bertsolaria **lehenengo deitura eta izenaren lehen hizkiarekin** izendatuko da. Adibidez: A.M. Peñagarikano, S. Colina, J. Maia, J.M. Irazu, U. Iturriaga, A. Mendiluze, M. Mendizabal...

**3.2.** **Deitura eta izenean lehen hizki bera duten bertsolariak egonez gero**, izenaren inisialari bigarren hizkia gehituko zaio. Lehentasuna, lehendik plazan dagoenari emango zaio: bertsolari bat bestea baino askoz berriagoa bada, lehenengoaren izenari hizki bakarrarekin eutsiko zaio, eta bigarrena izango da bi hizki eramango dituen. Adibidez: J. Agirre (<Joxe Agirre), Jn. Agirre (<Jon Agirre), Js. Agirre (<Joseba Agirre). Garai beretsukoak badira bi bertsolariak, biei jarriko zaizkie lehen bi hizkiak. Adibidez: As. Otamendi, An. Otamendi.

**3.3.** **Bertso saioaren aurkezpenean** idatziko da bertsolariaren izen osoa eta segidan **goitizena letra etzanez**. Bertsoaldiko **bertsoetan goitizena** baliatuko da **letra borobilez**.

**3.4.** Dena den, gomendagarria da argitalpenaren amaieran aurkibide bat gehitzea. Aurkibide honek, ezizen eta inisialak bertsolari bakoitzaren izen deitura osoekin nahiz beharrezko irizten diren gainontzeko datuekin lotuko ditu.

## 4. AURKEZLEA, GAI-EMAILEA ETA GAI-JARTZAILEA

Aurkezlea, gai-emailea eta gai-jartzailea bereizi egingo dira.

Aurkezleak, bertso ekitaldi bat inguratzen duten xehetasunen berri ematen du; gai-emaileak, bertsolariei saioan gaiak ematen dizkie; eta gai-jartzaileak, saioaren aurretik gaiak jarri edo prestatzen ditu. Funtzio ezberdinak pertsona ezberdinek betetzen badituzte, hala adieraziko da. Bestela, lan denak pertsona berak egin dituela ulertuko da, hau da, gai-emaileak. Guztiak letra borobilez idatziko dira. Adibidez:

Aurkezlea: Mikel Taberna

Gai-jartzailea: Bertsozale Elkarteko gai-jartzaile taldea

Gai-emailea: Bernardo Mandaluniz

Gai-jartzailea: Motxian Bertso Eskola

Gai-emailea: Jon Zaldua



Gai-emailea: Laxaro Azkune

## 5. GAIA

Gaia letra borobilez idatziko da, eta testuari dagokion irizpideetan adierazi bezala (ikus *Testuari dagozkion irizpideak*-eko 1. atala). Adibidez:

Gaia: Espetxean jaio eta hazi den haurra dugu Jon. Murua haren ama. Mundua ulertzeko zailtasunak ditu semeak eta amari galdezka hasi zaio.

## 6. NEURRIA

Neurria letra borobilez idatziko da. *Testuari dagozkion irizpideak*-eko 7. atalean esan dugun gisan, bertsoa lerrotan banatzeko bi usadio ditugu bizi-bizirik: Ipar Euskal Herrikoa (puntu osoa lerro bakarrean) eta Hego Euskal Herrikoa (hemistikioak lerrotan banatuta). Ohitura bat ala bestea erabiltzen dugunaren baitan izendatuko dugu ahapaldia. Adibidez:

*Maritxu nora zoaz I: Zortziko txikia (hg) / Lau puntuko txikia (ip)*

## 7. DOINUA

Doinua letra etzanez idatziko da eta *Bertso Doinutegian* izendatutako moduan. Doinua beste izen batekin ezagunagoa denean, lehena eta bigarrena jarriko dira. Adibidez: *Aranora joan ziran I / Sastarretik hasita.*

## 8. BERTSO ESKOLA LARRIZ ALA XEHEZ

Izen berezia delarik letra larriz idatziko da: Xenpelar Bertso Eskola. Orokorra edo arrunta delarik, bertso eskola: "Herriko bertso eskolak antolatu zuen".

## 9. KOKAPEN IRIZPIDEAK APLIKATUTAKO ADIBIDEA

DONOSTIA 2001-12-16

Aurkezlea: Mikel Taberna

Gai-jartzailea: Bertsozale Elkarteko gai-jartzaile taldea

Gai-emailea: Saroi Jauregi

A. Mendiluze – M. Lujanbio

Gaia: Zuek nortasun agiri edo identifikazio kartak zarete. Aitor, ENA edo Euskal Nortasun Agiria zara, eta Maialen, Espainiako nortasun agiria. Biok zaudete pertsona beraren karteran. Hiruna bertso, zortziko handian, Aitor hasita.

Neurria: Zortziko handia

Doinua: *Ludi bizitza abesti gozoz I*

A. Mendiluze

Gaur bi agirik topo egin degu  
baina zer demontre da hau?  
Bistakoa da: bere buruan  
aurretik eginak dirau.  
Nahi ez duela heldu zaizkio  
hainbat lege hainbat arau.  
Zu jarrarazi egin zaituzte  
eta ni berak jarri nau.

M. Lujanbio

Baina bidea nik libre daukat  
ta zuk bete-bete trabaz  
ni gazteleraz inprimatua  
eta zu berriz euskaraz...  
Gure jabea beti dabil zu  
beste baterako lagaz.  
Argazkia ere munituta dezu  
izango zuen dardaraz!

A. Mendiluze

Biak batera zeuzkan ordea  
dardara eta zentzuna.  
Ni egitea izan da beraz  
zurekiko erantzuna.  
Nik azaltzen det jabeak duen  
berearen maitasuna  
zuk bere izena azaltzen dezu  
ta nik bere nortasuna.

M. Lujanbio

Biak patrika berean gaude  
biak elkarren hurrean.  
Ni zurekin ez baina zu zaude  
nerekiko haserrean.  
Zu nortasuna omen zerala  
diozu modu errean.  
Nortasuna ere galtzen du batek  
goardia zibilen aurrean!

## A. Mendiluze

Goardia zibilen aurrean nahiz ta  
susto bat duen hartua  
ni atera nau nahiz eta izan  
zuregatik galdetua.  
Jarrera horrek ni indartzen nau  
ta zeu zera kaltetua.  
Indarra dezu baina horrela  
kenduko dizut lekua.

## M. Lujanbio

Neri lekua kendu nahiean  
al da zure jo ta kea?  
Oraindik indar haundia daukat  
beharko dezu tartea.  
Nere aurpegiak sortarazten du  
patxara eta pakea  
zure aurpegiak irekitzen du  
kalabozoko atea.

## C. BERTSOGINTZAKO ARIKETA IZENAK

Bertso-lanak honela izendatuko dira:

**Hasierako agurra**

**Bukaerako agurra**

**Agur berezia.** Sail honetan sartzen dira bertso bidez egiten diren: sari hartzeak, sari emateak, hileta agurrak, eskaintzak, omentzeak, eskertzeak eta aurkezpenak.

**Bakarka, azken-aurreko puntua emanda**

**Bakarka, azken puntua emanda**

**Bakarka<sup>2</sup>, gaia emanda**

**Bakarka<sup>3</sup>, gauza gaitzat emanda**

**Bakarka<sup>4</sup>, hitza gaitzat emanda**

**Bakarka, lau<sup>5</sup> oinak emanda**

**Bakarka, lehen puntua emanda**

---

<sup>2</sup> Bakarka / Binaka / Hirunaka / Launaka / Bosnaka / Seinaka / ... izan daiteke.

<sup>3</sup> Bakarka / Binaka / Hirunaka / Launaka / Bosnaka / Seinaka / ... izan daiteke.

<sup>4</sup> Bakarka / Binaka / Hirunaka / Launaka / Bosnaka / Seinaka / ... izan daiteke.

<sup>5</sup> Lau / bost / sei / zazpi / zortzi / bederatzi / ... izan daiteke.

**Bakarka, oina emanda.** Bertsolariari bertsoan erabili beharreko oin bat ematen zaionean.

**Binaka<sup>6</sup>, gai librean**

**Binaka<sup>7</sup>, puntutan gai librean**

**Binaka<sup>8</sup>, puntutan gaia emanda**

**Seinaka<sup>9</sup>, gaia emanda batek besteei.** Bertsolari batek banan-banan beste bertsolari guztiei kantatzen dienean. Bertsokideen erantzunak jasoko balitu, horiek ere bertsoaldi berean sartuko lirateke.

**Seinaka<sup>10</sup>, gaia emanda besteek bati.** Bertsolari guztiek banan-banan bertsolari bakarrari kantatzen diotenean. Bertsolari honen erantzun-bertsoak ere bertsoaldi berean sartuko dira.

**Ganbarako lana.** Edozein delarik ere ariketa, adierazi egingo da kartzelako lana bada.

Adibidez:

- Ganbarako lana: bakarka, gaia emanda
- Ganbarako lana: binaka, puntutan gaia emanda

---

<sup>6</sup> Binaka / Hirunaka / Launaka / ... izan daiteke.

<sup>7</sup> Binaka / Hirunaka / Launaka / ... izan daiteke.

<sup>8</sup> Binaka / Hirunaka / Launaka / ... izan daiteke.

<sup>9</sup> Hirunaka / Launaka / Bosnaka / Seinaka / ... izan daiteke.

<sup>10</sup> Hirunaka / Launaka / Bosnaka / Seinaka / ... izan daiteke.